

ঐ রত্নের মালা গাঁথতে চেয়েছে, তখনই 'রশ্মি' লিষ্ট হ'য়ে 'সূত্র' অর্থ নিয়ে তাকে সাহায্য করেছে। **অলঙ্কার শ্লেষগর্ভ রূপক।**

(v) “তৃতীয় দশকের শেষবৈশাখে কল্লোলের কলধ্বনি শোনা গেল বাঙলা সাহিত্যের আঙিনায়।”—জগদীশ ভট্টাচার্য।

—‘কল্লোল’=(১) ‘কল্লোল’-নামক বাঙলা মাসিক পত্রিকা ; (২) মহাতরঙ্গ (বড় ঢেউ)। ‘বাঙলা সাহিত্যের’ সূত্রে ‘কল্লোল’ পত্রিকার অর্থে সার্থক ; ‘কলধ্বনি’-সূত্রে ‘কল্লোল’ ‘মহাতরঙ্গ’ অর্থে সার্থক। আবার ‘কলধ্বনি’ কথাটির ব্যঞ্জনাৎ প্রতীয়মান হচ্ছে যে জগদীশ পত্রিকা ‘কল্লোলে’র উপর মহাতরঙ্গার্থক ‘কল্লোল’-কে আরোপ ক’রে সৃষ্টি করেছেন **শব্দশ্লেষ-অনুপ্রাণিত ব্যঙ্গ্য রূপক অলঙ্কার।**

২

৩। পুনরুক্তবদাভাস

কোনো বাক্যে একই অর্থে একের বেশী শব্দ বিভিন্নরূপে ব্যবহৃত হয়েছে ব’লে যদি মনে হয়, কিন্তু একটু মন দিলেই যদি দেখা যায় যে তারা একই অর্থে প্রযুক্ত হয় নাই, তাহ’লে যে অলঙ্কার হয় তার নাম **পুনরুক্তবদাভাস।**

‘পুনরুক্ত’ মানে একই শব্দের পুনরাবৃত্তি : নদী, নদী। ‘পুনরুক্তবৎ’ (‘বৎ’=মতো) মানে শব্দের প্রতিশব্দরূপে আবৃত্তি : নদী, তটিনী। ‘আভাস’ মানে দেখতে প্রতিশব্দরূপে পুনরাবৃত্তির মতন, কিন্তু অর্থ বিভিন্ন।

(i) সহসা **জলেশ পাশী** অস্থির হইলা—মধুসূদন।

—‘জলেশ’ আর ‘পাশী’ ছটিরই অর্থ বরুণ। কিন্তু ‘পাশী’ কথাটি এখানে প্রযুক্ত হয়েছে ‘পাশ’ (অস্ত্রবিশেষ) আছে যাঁর এই অর্থে। ‘জলেশ পাশী’=পাশ অস্ত্রের অধিকারী বরুণদেব।

(ii) “**তনু দেহটি** সাজাব তব আমার আভরণে”—রবীন্দ্রনাথ।

(iii) “**তনু দেহখানি** ঘেরিয়াছে ডুরে শাড়ী”— ঐ

—‘তনু’ আর ‘দেহ’ অর্থে এক ; কিন্তু এখানে তা নয়। এখানে ‘তনু’= **ছিপছিপে।**

কিন্তু, “**তনু তোমার তনুলতা** চোখের কোণে **চঞ্চলতা**” (রবীন্দ্রনাথ) এখানে কিন্তু একই ‘তনু’-র পুনরুক্তি বিভিন্ন অর্থে ; অলঙ্কার তাই যমক।

(iv) “**ত্রিযামা বামিনী** একা **সুসে** গান গাহি,

হতাশ পথিম্বাস্পদ ; **সামি, সেই আমি।**”—রবীন্দ্রনাথ।

দেবী জ্ঞানরূপা; তিনি এর মানে বুঝেছেন, ভক্তকবিকে বরও নিশ্চয় দিয়েছেন। কিন্তু আমাদের সসেমিরা অবস্থা। বড় কবিদেরও এমন বদ-খেয়াল চাপে, যেমন বিজ্ঞাপতির—

“সারঙ্গ নয়ন বচন পুন সারঙ্গ
সারঙ্গ তসু সমধানে।
সারঙ্গ উপর উগল দশ সারঙ্গ
কেলি করই মধুপানে ॥”

কবিতা নয়, সারঙ্গরঙ্গশালা! সোজা কথায়, রাধার—

‘নয়নে হরিণী বচনে কোকিল অপাদে ফুলশর,
কমলের বুকে মধু পিয়া তার খেলে দশ মধুকর।’—শ. চ.

অনুপ্রাস, যমক, শ্লেষবক্রোক্তি প্রভৃতির উপর মানুষমাত্রেই একটা স্বাভাবিক টান আছে। কবিরাও মানুষ। নানা কারণে তাঁরা কাব্যে এদের প্রয়োগ করেন। সীমার মধ্যে থাকলেই এরা সুন্দর, সীমা ছাড়িয়ে গেলেই অসুন্দর। রবিকাব্যে এদের অজস্র প্রয়োগ দেখতে পাই। অতি-আধুনিকদের কাব্যও বাদ যায় না। উদাহরণে এর প্রমাণ মিলবে।

অলঙ্কার-চন্দ্রিকার প্রথম সংস্করণে ‘নিরর্থক’ যমক-সম্পর্কে বলেছিলাম—
অনুপ্রাস স্বরের অসাম্যেও হয়, সাম্যেও হয়। কাজেই আমাদের উদাহরণটিকে (‘বঁধুর মধুর মনোহর রূপ’—ধুরম, ধুরম) ছেকানুপ্রাস বলব না কেন? এবার আর প্রশ্ন নয়; একে ছেকানুপ্রাসই বলব।

মন্তব্য : বাঙলায় অলঙ্কার-সম্বন্ধে যে দুইএকখানি বই আছে, তাতে আত্ম-মধ্য-অন্ত্য- এবং সর্ব-ভেদে চার রকমের যমকের কথা বলা হয়েছে।

- (i) “ভারত ভারতখ্যাত আপনার গুণে”
 - (ii) “পাইয়া চরণতরি তরি ভবে আশা”
 - (iii) “মনে করি করী করি কিন্তু হয় হয়।”
 - (iv) “আটপণে আদসের কিনিয়াছি চিনি।
অন্তলোকে ভূরা দেয় ভাগ্যে আমি চিনি”
- এবং (v) “কান্তার আমোদপূর্ণ কান্ত সহকারে।
কান্তার আমোদ পূর্ণ কান্ত সহকারে ॥”

সর্বত্রই গৃহীত হয়েছে যথাক্রমে এই উদাহরণগুলি (তৃতীয়টি ছাড়া)।

[শেষেরটির অর্থ—কান্তার = বনভূমি, দয়িতার; আমোদ = সৌরভ, আনন্দ ; কান্ত = বসন্তকাল, প্রেমাস্পদ ; সহকারে = সমাগমে, সঙ্গে। প্রথম পঙ্ক্তি =

বনভূমি বসন্তসমাগমে সৌরভপূর্ণ হয়েছে। দ্বিতীয় পঙ্ক্তি=দয়িতা প্রিয়সঙ্গে আনন্দিতা হয়েছে।]

প্রথমটিতে একই চরণে আঙ যমক, দ্বিতীয়টিতে একই চরণে মধ্য যমক, তৃতীয়টিতে একই চরণে অন্ত্য যমক (‘হয়’=ঘোড়া, ‘হয়’=ক্রিয়াপদ) এবং মধ্য যমক (‘করী’=হাতী, ‘করি’=ক্রিয়াপদ) আর চতুর্থটিতে হ্রস্বচরণে অন্ত্য যমক। পঞ্চমটিতে দ্বিতীয় চরণটি প্রথম চরণের পুনরাবৃত্তি—সর্কযমক।

(ক) সার্থক (সার্থক হ’লে শব্দগুলিকে বিভিন্নার্থক হ’তে হবে) :

✓(i) “প্রভাকর প্রভাতে প্রভাতে মনোলোভা”—ঈশ্বর গুপ্ত।

—প্রভাতে=প্রাতে; প্রভাতে (প্রভা-তে)=জ্যোতিতে।

✓(ii) “অস্বর অস্বর অস্বর পড়ে শিরে”—রামপ্রসাদ।

—অস্বর=বসন্ত; অস্বর=আকাশ।

(iii) “নিরমল নিরাকার নীরাকার নয়”—ঈশ্বর গুপ্ত।

—যথাক্রমে, আকারহীন আর জলাকার।

(iv) “আবরিছে দিননাথে ঘন ঘনরূপে”—মধুসূদন।

—নিবিড়; মেঘ।

(v) “মুরারিমুরলীধ্বনিসদৃশ মুরারি”—মধুসূদন।

—প্রথমটি শ্রীকৃষ্ণ, দ্বিতীয়টি ‘অনর্ঘরাঘব’-রচয়িতা কবি।

(vi) “সর্কদাই রয়েছেন জপমালা হাতে

ক্রিয়াকর্ষ নিয়ে; শুধু মন্ত্র-উচ্চারণে

লেশমাত্র নাই তাঁর ক্রিয়াকর্ষ-জ্ঞান!”—রবীন্দ্রনাথ।

—ক্রিয়াকর্ষ=আচার-অহুষ্ঠান; ক্রিয়াকর্ষ=ক্রিয়াপদ-কর্ষকারক।

(vii) “ঘন বনতলে এসো ঘননীলবসনা”—রবীন্দ্রনাথ।

—ঘন=নিবিড়; ঘন=মেঘ (মেঘের মতন নীল—‘ঘননীল’)।

(viii) “রক্তমাখা অস্ত্রহাতে যতো রক্তাধি”—রবীন্দ্রনাথ।

(ix) “চাহি না চাহিতে আর কারো প্রতি”—রবীন্দ্রনাথ।

(x) “কবির রমণী বাঁধি কেশপাশ

বসি একাকিনী বাতায়নপাশ”—রবীন্দ্রনাথ।

—এটিতে অন্ত্যযমক।

(xi) “আশার স্বপন ফলে কি হোথায় সোনার ফলে?”—রবীন্দ্রনাথ।

—প্রথমটি ক্রিয়াপদ (নামধাতু); দ্বিতীয়টি বিশেষ্য।

(xii) “অর্থ চাই রাজকোষে আছে ভূরি ভূরি ;
রাজস্বপ্নে অর্থ নাই যত মাথা খুঁড়ি।”—রবীন্দ্রনাথ ।

(xiii) “অর্থ তোমার বুকে কেবল লোকে,
তোমার অর্থ বুঝবে বলো কবে।”

—যতীন্দ্রমোহন বাগচী ।

(xiv) “সত্য কথাই বলি,
বড়লোক যারা—খেতে বলে কেউ ? মিছে এত বড় হলি।”

—যতীন্দ্রমোহন ।

(xv) “জীবে দয়া তব পরম ধর্ম, ‘জীবে’ দয়া তব কই ?”

—কবিশেখর কালিদাস ।

—রূপ গোস্বামীর প্রতি সনাতন গোস্বামীর উক্তি। ভাতুপুত্র জীব গোস্বামীকে শ্রীরূপ কঠোর শাস্তি দিয়েছিলেন ; উক্তির উপলক্ষ এই। দ্বিতীয় ‘জীব’ জীব গোস্বামী ।

(xvi) “আধারের কালি কালির লিখন একাকার করি দিল”

—মোহিতলাল ।

(xvii) “ভোজন কর কৃষ্ণজীরে, ভজন কর কৃষ্ণজীরে”—দাশরথি ।

—শ্রীকৃষ্ণের ভারি অসুখ ; শ্রীকৃষ্ণই আবার যাচ্ছেন কবিরাজ সেজে তাঁর চিকিৎসা করতে। বৃন্দার সঙ্গে পথে কবিরাজমশায়ের দেখা। বৃন্দার আবার এক ব্যারাম হয়েছে—সবই তিনি কালো দেখছেন। কবিরাজ তাঁকে বাতলে দিলেন ওষুধ। ‘কৃষ্ণজীরে’ কালোজীরে (সত্যই বায়ুনাশক) ; কৃষ্ণজীরে = কৃষ্ণজী-রে (-কে) = শ্রীকৃষ্ণকে ।

(xviii) “আর কি শুধু আসার আশায় ছলি ?”

—কবিশেখর কালিদাস ।

(xix) “পেয়েছে সে

নবঘনশ্যাম শ্যামে তার”—যতীন সেন ।

—‘শ্যাম’ বর্ণ ; ‘শ্যাম’ শ্রীকৃষ্ণ ।

(xx) “ধানের শীষে আগুনের শীষ—সমস্ত মাঠ ভ’রে গেছে এখন
সোনার আমেজে”—অচিন্ত্যকুমার ।

(xxi) “আসা তার পাপড়িতে পাপড়িতে খোলে আশা”—বিষ্ণু দে ।

(xxii) “পুরনারী না হ’লেও নারীর স্বভাবে পুরো নারী”

—গোবিন্দ চক্রবর্তী ।

মন্তব্য : ‘আসা-আশা’, ‘পুরনারী-পুরো নারী’, ‘স-শ’ ‘র-রো’-সঙ্গেও যমক। বাঙলায় বর্ণধ্বনির সাম্যবিচার বহুক্ষেত্রে চলে তার প্রকৃতিগত উচ্চারণ-বৈশিষ্ট্যের পথে। এর বিশদ আলোচনা ক’রে এসেছি অনুপ্রাস-প্রসঙ্গে। আমাদের ‘শষস’ সবই উচ্চারণে ‘শ’ (sh)। বাঙলা শব্দের অন্ত্য ‘অ’ধ্বনি যেখানে উচ্চারিত, সেখানে প্রায় সবক্ষেত্রেই তার উচ্চারণ ও-বৎ—‘পুরনারী’ উচ্চারণে স্বভাবতঃই ‘পুরোনারী’। স্তুরাং সংজ্ঞার ‘স্বরধ্বনিসমেত’ লক্ষণটি এখানে মিলছে না, একথা মনে করা ভুল। তারপর ‘শ্যাম-শ্যামে’, ‘শীষে-শীষ’ : শ্যামে=শ্যাম (+‘এ’ বিভক্তিচিহ্ন), শীষে=শীষ (+‘এ’ বিভক্তিচিহ্ন)। বিভক্তিচিহ্ন স্বরধ্বনির বৈষম্য ঘটিয়েছে। এ অবস্থায় যমক না ব’লে অনুপ্রাস বলাই উচিত ছিল। কিন্তু অনুপ্রাস বলা চলে কি? চলে না। চলে না এই কারণে যে অনুপ্রাসজনিত আনন্দের উৎস শুদ্ধ বর্ণধ্বনির সাম্য আর সার্থক যমকে আনন্দ ধ্বনিসাম্য এবং অর্থ-বিভিন্নতার মিলন হ’তে উৎসারিত। এখন, যে যমকও হচ্ছে না আবার অনুপ্রাসও হচ্ছে না, অথচ একটা কিছু হচ্ছে এবং তা সুন্দর, সেই ‘শ্যাম-শ্যামে’ ‘শীষে-শীষ’কে কি বলব?

বলব—যমকই।

আমরা বলছি সার্থক যমকের কথা। বর্ণগুচ্ছের অর্থ থাকলে সে আর শুধু বর্ণগুচ্ছ নয়, প্রাতিপদিক। এই প্রাতিপদিকের সঙ্গে বিভক্তি যোগ হ’লে, তার নাম হয় পদ। বাঙলায় বিভক্তিচিহ্ন সকল পদে দেখা যায় না। আমাদের ‘শ্যাম’, ‘শীষ’ এমনি চিহ্নহীন পদ; ‘শ্যামে’ ‘শীষে’ বিভক্তিচিহ্নযুক্ত পদ। কোনো শব্দালঙ্কারে বিভক্তি যদি বাধা সৃষ্টি করে, সেখানে অলঙ্কারত্বকে প্রতিষ্ঠা করতে হয় বিভক্তিচিহ্নকে উপেক্ষা ক’রে প্রাতিপদিককে পূর্ণমূল্য দিয়ে। ‘ধানের শীষে আগুনের শীষ’ গুনলেই মন দেখতে পায় বিভিন্ন অর্থ নিয়ে ‘শীষ’ শব্দটার খেলা, বিভক্তিচিহ্ন চোখেই পড়ে না। বাঙলায় এই পথে চলতে হবে। একে ‘লাটানুপ্রাস’ বলা অসম্ভব; কারণ এ অনুপ্রাসে হয় অর্থসমেত শব্দের পুনরাবৃত্তি; অর্থের একটু পার্থক্য হয় তাৎপর্যে :

“নয়ানের কাজল বয়ানে লেগেছে কালোর উপরে কালো”— চণ্ডীদাস।
এখানে দ্বিতীয় ‘কালো’টি কালো-ই (Black)। তাৎপর্য নিবিড় কালো (যেহেতু কাজল)। এখানে লাটানুপ্রাস, যমক নয়। আমাদের উদাহরণে অলঙ্কার যমক। এমনি আরও কয়েকটি উদাহরণ :

(xxiii) “মজল করুন তিনি মজলের দেশে।”—ঈশ্বর গুপ্ত।

‘তিনি’—বেদানা। দ্বিতীয় ‘মজল’ মঙ্গোলীয় জাতি।

(xxiv) 'সংসারে সবই সং, সার বলে কিছুই নাই।'—শ. চ.

(xxv) "মানসসরসে

সরস কমলকুল বিকশিত যথা।"—মধুসূদন।

(xxvi) "চন্দ্রহারে চন্দ্রের হার" —বঙ্কিমচন্দ্র।

(xvii) "কৃষ্ণচন্দ্রের মনোরঞ্জন করতে বাধ্য না হ'লে তিনি বিজ্ঞানসুন্দর রচনা করতেন না, কিন্তু তাঁর হাতে বিজ্ঞা ও সুন্দরের অর্ধ মিলন সংঘটিত হ'ত।"

—বীরবল।

(xviii) "আমার স্মৃতিতে! দেখি আজ থেকে সমস্ত স্মৃতি বাদ দিলাম দিদি"—অচিন্ত্যকুমার।

(খ) একটি সার্থক অন্ত্যটি নিরর্থক ঙ

(i) "তারার যৌবন-বন-ঋতুরাজ ভূমি"—মধুসূদন।

(ii) "যৌবনের বনে মন হারাঈয়া গেল"—জ্ঞানদাস।

(iii) "করেছ ভ্রমণ মম যৌবন-বনে"—রবীন্দ্রনাথ।

(iv) "ভীষণ অশনিসম প্রহরণে রণে"—মধুসূদন।

(v) "কালান্তরুর গুরু গন্ধ লেগে থাকতো সাজে"—রবীন্দ্রনাথ।

(vi) "গলায়ে গলায়ে বাসনার সোনা"— ঐ

(বাঙলা উচ্চারণগত ধ্বনিসাম্য)

(vii) "মাসীমার সীমাতেও আমি আসিনি।"—অচিন্ত্যকুমার।

(viii) "প্রবীণ প্রাচীন চীন" —রবীন্দ্রনাথ।

(ix) "নানা বেশভূষা হীরা রূপাসোনা

এনেছি পাড়ার করি উপাসনা।"— ঐ

(র্+উপাসনা, উপাসনা)

মন্তব্য : মনে রাখতে হবে যে পণ্ডে অন্ত্যযমক দুই চরণের অন্ত্যপদ নিয়ে সৃষ্ট হ'লে, পদদুটি সহজেই অন্ত্যানুপ্রাসও হ'য়ে যায়—

"যাইতে মানস-সরে

কার না মানস সরে?"

এখানে 'সরে-সরে' একাধারে যমক আর অন্ত্যানুপ্রাস দুইই। আমাদের এই

(ix) উদাহরণটিতে অন্ত্যানুপ্রাস এবং 'নিরর্থক-সার্থক' লক্ষণের অন্ত্যযমক দুটিই বর্তমান।

(x) “মলের ঝলমলে চরণ টলমল”—বঙ্কিমচন্দ্র ।

(xi) “নিখিল গগন কাঁপিছে তোমার পরশ-রসতরঙ্গে”—রবীন্দ্রনাথ ।

(xii) “পরশে তার রসে তরুণ বাসি ফুলের হার”—করুণানিধান ।

(xiii) “আরণ্য-আশ্রম নেই, কিন্তু তার জায়গা জুড়েচে সাধারণ্য-আশ্রম । এখন দেশে আরণ্যক পাওয়া যায় না, কিন্তু সাধারণ্যকের সংখ্যা কম নয় ।”

(আরণ্য, সাধ্ + আরণ্য ; আরণ্যক, সাধ্ + আরণ্যক)

(xiv) “আছি গো তারিণী ঋণী তব পায়”—দাশরথি ।

(xv) “শেফালি রায়ের সঙ্গে আমার এক ফালিও পরিচয় নেই”

—অচিন্ত্যকুমার ।

বাঙলায় একই শব্দের ভিন্নার্থে দুই বা ততোধিকবার আবৃত্তি যমক ব'লে মানা হয় । শাস্ত্রের জটিলবিচারমূলক সূক্ষ্ম বিভাগ বাঙলা যমকে আমরা কতকটা পরিহার ক'রেই চলি । আশু, মধ্য, সর্বরূপ যমকভেদ ছাড়াও একজাতীয় যমক আমাদের এককালে খুব প্রিয় ছিল । দাশরথি, নীলকণ্ঠ, ঈশ্বর গুপ্ত, ভারতচন্দ্র এইপ্রকার যমকসৃষ্টির জন্ম প্রসিদ্ধ ছিলেন । আমরা মাত্র দাশরথির রচনা থেকে কয়েকটি উদাহরণ দিলাম :

(i) “(আমার) কাজ কি গোকুল ? কাজ কি গো কুল ?

ব্রজকুল সব হোক প্রতিকুল...”

(ii) “কাজ কি বাসে ? কাজ কি বাসে ?

কাজ কেবল সেই পীতবাসে

সে যার হৃদয়ে বাসে

সে কি বাসে বাস করে ?”

(iii) “বাছা করে সর সর পাণিনী বলে সর সর

অবসর হয় না সর দিতে ।

সর সর ক'রে ত্রিভঙ্গ হয় বাছার স্বরভঙ্গ

বাক্যশর হানে আবার তাতে ॥”

যমকের সঙ্গে Pun (Paronomasia)-এর কতকটা মিল আছে । একটা উদাহরণ দিচ্ছি :—

“In cards a good deal depends on good playing and good playing depends on a good deal.” প্রথম good deal = muck ; দ্বিতীয় good deal = good distribution of cards ।